



pepsi pipol



www.facebook.com
/pepsipng



na painim aut
moa long ol
narapela
promosens
blong mipla
bihain taim.



Singaut
long PM i
risan - P2

UNICEF givim
kaikai bilong
daunim mal-
nutrisen - P4

Lukim
Komentri
katun - P13



HAT LONG GO INSAIT: Planti manmeri i bin bung ausait long banis bilong Waigani kot haus long go harim kot bilong Praim Minista long aste. Tasol ol polis na sekyuriti i no larim ol long go insait long banis. Tasol kot bilong bilong PM ol skruim i go long Fraide dispela wik. *Poto Nicky Bernard.*

Jas i krosim ol loya

...ol loya i no redi na askim long moa taim

- Ekting polis komisina i makim nupela loya
- Skruim Kot bilong PM i go 2-pela de moa
- Jas i no wanbel long ol loya

Stanley Nondol i raitim

Nesanel Kot Jas, Jastis Ere Kariko i no wanbel long ol loya i no redi na kamap long kot bilong Praim Minista, Peter O'Neill asde long Waigani Nesanel Kot. Long dispela as Jastis Kariko i skruim kot i go long dispela wik Fraide.

Jastis Kariko i tok long las wik Trinde em i bin skruim dispela kot i kam long dispela wik bikos ol i bin senisim ol loya na ol i no redi gut na asde wankain samting gen i kamap.

Olsem na Jastis Kariko i tok em I les tru long harim gen olsem ol loya i no redi.

Igo moa long pes 2

2014 THE NATIONAL MASK FESTIVAL RABAUL JULY 16-20, 2014

AIR NIUGINI DOMESTIC TRAVEL VALUE

K1600 PP 2 NIGHTS TWIN SHARE RAPOPO PLANTATION RESORT	K1591 PP 2 NIGHTS TWIN SHARE KOKOPO BEACH BUNGALOW	K1552 PP 2 NIGHTS TWIN SHARE GAZELLE INTERNATIONAL
--	---	---

Inclusions: • Return airfares Port Moresby to Rabaul
• Accommodation as specified • Return airport and mask festival transfers
• Daily festival passes • All taxes and surcharges

Call toll free on **180 2121**
or email: tours@airniugini.com.pg
for more information


Air Niugini
www.airniugini.com.pg
 



Singaut long PM i mas risain

“Senisim mi long 2017 na palamen”: PM

Stanley Nondol i raitim

BIKPELA singaut i go long Praim Minista Peter ON’Neill long risain long sia bilong Praim Minista na larim jastis sistem bilong kantri i lukluk na stretim hevi i kamap long Paul Paraka Lo kampani we nau i stap long han bilong polis na kot. Tasol Mista O’Neill i strongim kona yet na i tok larim kot i stretim na em bai no inap risain.



Praim Minista O’Neill.

Ol Oposisen memba wan-taim lida Belden Namah, olupela minista bilong Jastis na Atoni Jenerel, Kerenga Kua, memba bilong Kandep Don Polye, na ol NGO grup na sumatin bilong yunivesiti (UNG) i singaut long praime minista long risain na larim jastis sistem i mekim wok bilong em.

Mista Polye i tok Praim Minista O’Neill i no ken yusim opis bilong praime minista long abrusim jastis long kamap long hevi bilong em. Polye i tok no gat wanpela man i gat rait long givim nem nogut i go long bikpela opis long gavman (opis bilong praime minista) long banisim ol yet. Em i tok O’Neill i mas i gat rispek long wok em i holim na i mas risain bikos em i gat ares waren bilong polis.

Mista Namah i mekim wankain singaut long O’Neill i mas lusim sia bilong praime minista.

Mista Kua i tok i gat planti asua i stap na praime Minista i mas risain.

Long dispela wik tu ol NGO na ol sumatin bilong UPNG i singaut long praime minista i mas risain na larim wok painim i kamap na ol pipel bilong kantri i mas save long tok tru.

Maski ol singaut i kamap, Praim Minista O’Neill i tok ol pipela bilong kantri bai makim husat bai makim ol long opis bilong praime minista long 2017 long taim bilong ileksen olsem ol i bin makim em long 2012 na i tok em bai no inap risain.

O’Neill i tok em i no bin sainim leta we oposisen i putim komplek na wok painim i kamap na kantri i mekim bikpela nois long dispela.

Em i tok singaut bilong ol politisen olsem Sir Michael, Kerenga Kua, Don Polye, Belden Namah na ol arapela em singaut nating we ol i no gat mendet o papa wankain olsem ol pipel bilong kantri i save makim long ilkesen taim

Praim Minista O’Neill i singaut long ol dispela lain olsem sapos ol i laik kism sia bilong praime minista, orait ol i ken kism bihain long 2017 ileksen. Mista O’Neill i tok ol i ken go long floa bilong palamen na senisim em long sia bilong praime minista na i no ken go long strit na midia na mekim ol kain kain nois na singaut long em long risain.

Em i tok Don Polye na Kerenga Kua i toktok long em bai risain bikos tupela i belhat long em i rausim tupela long wok minista.

O’Neill traim namba pawa long palamen

Stanley Nondol i raitim

GAVMAN bilong Praim Minista Peter O’Neill i traim namba pawa na skruim taim bilong palamen i go long Ogas 26.

Taim palamen i bung long 2 klok long apinun long Tunde, lida bilong gavman bisnis James Marape i askim palamen long muvim wanpela mosen we i no gat long tok save i stap long pepa.

Mista Marape i tok dispela palamen kibung i bilong toktok na kamapim lo bilong Soveren Wel Fan (SWF), na senis long lo bilong seksen 145 bilong konstitusen we i toktok long kamapim vot i no gat bilip.

Em i tok kantri i holim wanpela bikpela kibung bilong Melensia Festival bilong Ats na Kalsa na ol tripela praime minista bilong Pasfik Ailan kantri bai kam long PNG olsem na em i askim spika long skruim palamen i go long mun Ogas.

Ol memba bilong oposisen i no wanbel long dispela na palamen i vot long dispela tasol gavman i soim moa strong long namba bilong en wantaim 74 memba i win long skruim bung bilong palamen i go long Ogas.

Ol 4-pela memba bilong oposisen wantaim Atoni Jenerel bipo Kerenga Kua i vot egensim gavman.

Bihain long spika i skruim palamen i go long Ogas 26, Oposisen i singautim ol nius lain na i tok Praim Minista Peter O’Neill wantaim lain bilong em i skruim palamen long givim ol taim long painim sampela rot long sevim praime minista long ol komplek i stap nau long kot.

Oposisen Lida Belden Namah i tok dispela kain pasin long palamen i skruim taim i no stretkantri i gat bikpela politikel hevi na palamen em wanpela hap we olgeta memba i makim pipel long autim wari bilong ol tasol wok spika i mekim wantaim gavman i no makim stret demokrasi.

Mista Namah, na deputi oposisen lida Sam Basil, Sumkaa memba Ken Fairweather, Rabaul MP Allan Mqrat na Ross Seymour i tok gavman i giaman long givim ol kain toktok long abrusim ol hevi tokotk oposisen i redi long autim long palamen na i yusim namaba bilong ol long surukim palamen.

Oposisen i tok gavman i ken mekim olsem tasol bai ronwe we liklik taim tasol na lo bilong kantri i stap pinis ana klostu taim bai kism ol.

Mista Basil i tok O’Neill wanataim lain bilong i ken yusim posisen na namab na pilai raun tasol wanpela taim bai ol i kism mekim save bilong lo na em yumi olgeta i save pinis olsem taim bilong ol long kism taim long ol asua bilong ol i kam klostu.

O’Neill tok Koim egensim intres bilong kantri

PASIN siaman bilong Tas Fos Swip (TFS), Sam Koim, i mekim long go long Australia na toktok wantaim gavman bilong Australia long ol samting i kamap nau long politiks bilong PNG i no gutpela na i no gutpela long kantri.



Siaman bilong Tas Fos Swip (TFS), Sam Koim.

Stat long las wik yet, ol polis ditektiv i wok long askim Mista

O’Neill long toktok wantaim em na kism ol tok kliia long ol samting, tasol praime minista i no go lukim ol na ol hevi i kamap.

Wanpela long ol samting i kamap bihainim hevi em gavman i stopim TSF long mekim wok, na rausim Mista Koim.

Mista Koim i wanpela loya long opis bilong Atoni Jenerel. Gavman i bin makim em long go pas long ol wok painim long pablik mani i wok long lus long stil pasin.

Long dispela wik, Praim Minista O’Neill i tok “pastaim bosman bilong TFS, Mista

Koim, i stap long Australia i go egensim intres bilong PNG, na dispela i soim long ples kliia olsem Mista Koim i laik go insait long politiks bilong dispela kantri,” Mista O’Neill i tok.

Mista O’Neill i tok Mista Koim i laik traim long stopim ol developmen asistens helpim program Australia i save givim long PNG long edukesen, helt na ol komyuniti wok long Manus.

Mista O’Neill i tok Mista Koim i wokim sem pasin long kism ol politisen bilong Australia i go insait long ol samting bilong PNG yet.

Jas i krosim ol loya

I kam long pes 2...

Jastis Kariko i mekim dispela toktok bihain long nupela loya bilong Polis Dipatmen Sam Bonner, i tok em i nupela loya na i askim kot long givim em sampela taim long redi gut na makim polis dipatmen long eplikesen bilong ares waren bilong Praim Minista Peter O’Neill.

Mista Bonner i tokim kot olsem Minista bilong Jastis na Atoni Jenerel Ano Pala na Ekt-ing Polis Komisina Jeffrey Vaki i makim em long kism ples bilong loya Paul Mawa long dispela wik yet na em i no redi long harim kot na olsem na em i askim kot long givim em 21 de.

Jastis Kariko i askim loya bilong praime minista Tiffany

Twivey, loya bilong Paul Paraka, Martin Kombri, na loya bilong James Marape long tingting bilong ol long askim bilong Mista Bonner na olgeta i wanbel.

Tasol Jastis Kariko i mekim disisen na i tok em bai no inap skruim kot i go moa yet na i tok, kot bai go het long gutpela bilong kantri.

Bihain long en loya bilong Paul Paraka, Mista Kombri i askim kot long givim ol tupela moa wik bikos em i tok em i no kism ol kot pepa bilong kot kes bilong ares waren bilong Praim Minista.

Jas i askim Mista Kombri, “bilong wanem na yu no mekim dispela toktok taim yu kamap long kot las wik? Na husat loya i bin kism kes bilong Marape long dispela kot pastaim?”

Mista Kombri i bekim askim bilong Jas olsem Paul Paul Paraka i save makim em yet long kot.

“Na bilong wanem na em i no givim ol kot pepa long yu?” Jas i askim em.

Jastis Kariko i tokim ol loya na i tok dispela em i no wanpela nupela kes na ol i no redi. Em i tok em i eplikesen tasol bilong polis i no ken arestim Praim Minista.

Long las wik Trinde Jastis Kariko i skruim dispela kot i kam long Trinde dispela wik, bihain long Mista Vaki i makim loya Paul Mawa long kism ples bilong loya bilong polis yet, Nicholas Miviri husat i bin go pas long stretim kot pepa bilong arestim Mista O’Neill.

Jastis Kariko i tok dispela kot bai no inap skruim i go moa long dispela eplikesen, tasol em orait long intres bilong klaien bilong Martin Kombri em i skruim i go long Fraide 27 Jun.

Mista Bonner i tok ausait long kot olsem Ekt-ing Polis Komisina i makim em long makim Polis Dipatmen na em i laik bilong kot long skruim taim.

Em i tok em bai kism edvais bilong Ekt-ing Komisina Vaki na bai kam bek na tokim kot long tumora.

Polis Komisina Vaki i stopim pablik protes

Nupela Polis Komisina, Jeffrey Vaki i tok em i stopim dispela protes mas long bikos em i tingting long pablik sefti.

Praim Minista Peter O’Neill i bin tokaut long FM Redio tokbek olsem em bai no inap larim dispela protes mas i go het.

Mista Vaki i tokaut olsem long oltaim bipo, ol kain protes i no save go gut na olsem, em i stopim protes mas i sapos long kamap long Tunde.

PNG Sivil Raits ektivis, Noel Anjo i tok ol i bin laik protes bikos ol i laik Peter O’Neill i mas lusim wok bilong praime minista na givim em yet i go long polis long kwestenim em.

Mista Anjo i tok protes i soim olsem ol pablik i no amamas long ol pasin praime minista i wokim long pinisim sampela minister na lidaman long gavman husat i save pait egensim korapsen.

Mista Anjo i tok ol i bin aplai long pemit o tokorait wanpela wik i go pinis na ol i kism tokorait long ol polis pinis.

Tasol MistaVaki i stopim dispela protes mas.



**Yes ol skwad!
Noken lus tingting
long baim
WANTOK
Niuspepa Tude!**

**Em niuspepa bilong
yumi ol PNG
stret!!!
K1 tasol!**

Oposisen i tok ol i gat namba tu pas bilong PM

Stanley Nondol i raitim

OPOSISEN lida, Belden Namah i tok oposisen i painim namba tu pas bilong Praim Minista Peter O'Neill na putim ples klia long pablik na i tok dispela i soim olsem O'Neill i sainim namba wan leta long K71.8 milien kina i go long Paul Paraka Loya.

Mista Namah i bin putim komplek long Polis Fraun Skwad long K71. 8 milien i go long Paraka Loya. Dispela hevi i bin wanpela bikpela stori long politiks bilong kantri long tupela wik na stap nau long nesanel kot.

Mista Namah wantaim ol oposisen memba i soim kopi bilong dispela pas long ol niuis lain asde.

Namba wan hap bilong dispela pas i go long Minista bilong Fainens James Marape i tok "em i kam long atensen bilong mi olsem dispatmen bilong yu bin kisim instraksen long baim ligel fi bilong Paraka Loya long wanpela leta bilong mi long Januəri 24, 2012 i go long

Minista bilong Tresari.

Mista O'Neill i bin tok strong tru olsem dispela signetsa long pas i no bilong em.

Em i tok sampela lain i kopi long singetsa bilong em antap long pas na i bin givim tok orait long Task Fos Swip long kamapim wok painimaut long dispela.

Tasol long Tunde, Oposisen i tok, "Dispela toktok bilong O'Neill i no sainim namba wan leta i no tru bikos mipela nau i gat namab tu pas bilong Praim Minista O'Neill i go long Mista Marape long bihainm namba wan pas." Namah i tok.

Long Mande Praim Minista i bin go long FM 100 tok bek program na em i tok em i bin sainim planti pas long wanpela yia. Na em i tok strong yet olsem bai em i no inap risain long sia bilong praim Minista bikos dispela komplek i no tru.

Em i tok em i no bin sainim leta long baim Paraka Loya. Em i tok maski ol wok painim bilong Tas Fos Swip na polis i tok em leta bilong em, nu-

pela wok painim bai kamap long dispela bikos politiks i kam insait long wok painim bilong Tas Fos Swip na polis.

Mista O'Neill i tok ol pipel i makim em long kamap praim minista long 2012 ileksen na singaut long em long risain i no gat pawa wankain olsem ol pipel i gat na makim em.

Oposisen i tok pasin korapsen i bikpela tru long poli-

tiks bilong PNG na i tok ol bai pait strong yet long lukim tok tru bai kamap ples klia long kot.

Ol oposisen i singaut long olgeta pipela bilong kantri long sapatim kot bilong oposisen long askim praim minista long lusim sia bilong em na larim wok painim na lo i go het long mekim wok bilong en.



Praim Minista Peter O'Neill.



OPOSISEN lida, Belden Namah.

Manmeri mas makim PM: Kelly Naru

Bustin Anzu i raitim

OL PIPEL mas i gat pawa long vot long Praim Minista na i no ol politikel pati husat i winim planti sia bihain long ileksen, dispela em tingting bilong Gavena bilong Morobe Kelly Naru.

Mista Naru i tok i luk olsem posisen bilong praim minista i kamap olsem wanpela bikpela bisnis tru we i save kisim planti taim bilong ol lida na ol i no save tingting moa long ol pipel bilong dispela kantri. Em i tok long dispela as, ol manmeri bilong Papua Niugini yet i mas vot long Praim Minista.

"Larim ol manmeri i votim Praim Minista. Taim ol manmeri i votim Praim Minista, bai tingting bilong em i stap wantaim ol pipel. I no olsem nau we ol politikel pati i makim praim minista. Dispela bai mekim praim minista i mas lukluk oltaim long baksait bilong em bipo long em i mekim sampela impoten disisen," Naru i tok.

Em i mekim dispela toktok long Lae long taim em i opim wanpela 3-pela de woksop long trening na developmen bilong ol politikel pati.



Gavena bilong Morobe Kelly Naru.

planti developmen i wok long kamap insait long politiks bilong dispela kantri.

"Long sistem bilong gavman yumi, save luksave na holim pasim konstitusen we i save tok, olgeta pawa i stap wantaim ol pipel. Na dispela pawa em yumi i givim i go long ol lida yumi yet i makim. Na ol dispela lida bai sevim gut ol manmeri," Naru i tok.

Naru i tok long gutpela bilong gutpela gavenens na demokrasi, olgeta i mas luksave long rul bilong lo na ol lida i mas soim rispek na givim sapat i go long pawa bilong ol pipel long dispela kantri.

Accessible
12,000
locations nationwide

Safer
Less cash, less risk

Cash Out
FREE at time of purchase

Convenient
Located at BSP Agent or Merchant in your community

Cheaper
Standard fees apply*

wantok moni
Cash out

Better than Cash

*BSP Merchants are not permitted to apply surcharges on BSP EFTPS.

For more information
 320 1212 / 7030 1212 - 24/7
 servicebsp@bsp.com.pg
 www.bsp.com.pg



PNG givim K600,00 long Palau

Long Tunde dispela wik, Prais Minista Peter O'Neill i tok promis long givim K600,000 i go long Ripablik bilong Palau long holim kibung bilong ol lida long dispela yia. Papua Niugini i soim gutpela pasin gen long ol liklik ailan kantri long Pasifik rijon.

Ripablik bilong Palau, em i wanpela kantri long Maikronesia i gat 21,000 pipel i stap long 250 ol liklik

ailan, na em bai go pas long holim namba 45 Pasifik Ailan Lida Samit bilong dispela yia.

Ikonomi bilong Ripablik bilong Palau i save strong long mani helpim i kam long ausait, olsem na Presiden bilong ol Tommy Remengesau Jr. i askim PNG long helpim ol long holim dispela bikpela kibung.

Prais Minista Peter O'Neill i sori

na soim sapot bilong PNG wantaim dispela K600,000 em i promis long givim ol.

Dipatmen bilong Foren Afeas las wik i salim dispela mani i go long gavman bilong Palau.

Dispela bikpela kibung bai kamap bai ol i holim long Julai 29 i go inap long Ogas 2 long dispela yia long Koror Ailan bilong Palau we i gat planti pipel i stap.

"Palau, i gat wankain hevi olsem ol narapela liklik ailan kantri long rijon, olsem em i save kisim mani long ausait kantri tasol na tu long birua i stap long solwara i wok long kam antap na daunim moa graun bilong ol," Mista O'Neill i tok.

"Yumi gat bikpela ikonomi long rijon, olsem na yumi mas sanap redi long helpim ol brata bilong yumi taim ol i singaut long helpim

ol," em i tok.

"Sample bikpela toktok bai kamap long dispela kibung em ol toktok bilong klaimet senis, transnesenel kraisim o pasin bilong brukim lo i go i kam namel long ol kantri, wok go i kam bilong ol wokman meri, na ol narapela toktok bilong stretim sindaun bilong ol pipel long rijon.

UNICEF givim kaikai bilong daunim malnutrisen

MALNUTRISEN o sik bun nating em i wanpela imejensi i no gat nois bilong em insait long Papua Niugini na em inap long kamapim dai bilong ol pikinini krismas bilong ol i aninit long 5-pela yia.

Em i wok long bagarapim gro bilong ol liklik pikinini na tu tingting bilong ol bai i no kamap gut long bihain bai ol i ken kamap gut long skul na mekim gutpela wok long laip bilong ol. Malnutrisen em i as bilong planti sik long ol pikinini na bikpela lain i save kisim.

"Malnutrisen em i no wok bilong helt sekta tasol. Em i wok bilong olgeta sekta long putim mani na samting long daunim hevi bilong malnutrisen. Ol i mas gat plen long mekim ol wok painimaut na luksave long dispela sik hariap bipo long em i kamap bikpela na bagarapim pikinini," Asisten Seketer long YUNAITET Nesens na UNICEF Deputi Eksekutiv Dairekta, Yoka Brandt i tok.

Mis Brandt i bin kam long PNG long dispela taim na em i go lukluk raun long sampela wok bilong UNICEF na tu long Wod bilong ol Pikinini insait long

Pot Mosbi Jeneral Haus sik. Long PMGH em i bin givim sampela nutrisen saplai long wod bilong pikinini long ol helt woka i ken givim long ol sik pikinini.

Insait long 10-pela yia mak bilong ol liklik bebi i dai taim ol i no winim 5-pela krismas yet, i no bin go daun tumas. Ol ripot bilong kantri i soim olsem klostu hap namba bilong ol pikinini long PNG i kamap sotpela, em i 45 pesen, 24 pesen em hevi bilong ol i stap aninit long mak na 14 pesen i wok long kamap bun nating na i no gat strong long daunim bikpela sik.

Mis Brandt i singaut long gavman atoriti husat i gat wok long dispela long ol i mas kirap na lukluk long dispela hevi na kamapim ol rot na menesmen sistem bilong stretim bikos em i ken bagarapim planti lain populesen.

Ol pikinini i stap olsem malnaris o i no gat strong i ken dai taim ol liklik sik i kisim olsem pekpek wara na strongpela kus. Sapos pikinini i no kisim marasin hariap bai em i ken bagarapim gro bilong em long bodi na long tingting.

Long stretim dispela hevi, UNICEF i wok long sapotim Gavman long kamapim wanpela multi-sektorel nesanel nutrisen polisi na long lukluk gen long Nesanel Protokol long Menesim ol Strongpela Malnutrisen.

UNICEF i givim klostu long 3,000 katen bilong ol kaikai bilong stretim sik bilong ol malnaris pikinini i go long 10-pela provinsal haus sik insait long ol provins we ol i lukim malnutrisen i bikpela tru. Pot Mosbi Jeneral Haus sik i wanpela bilong ol dispela haus sik na em i wanpela bilong ol namba wan lain haus sik long kisim ol dispela malnutrisen kaikai saplai.

"Malnutrisen em i no hangere o no gat gutpela kaikai tasol, nogat. Ol bebi na ol liklik pikinini em isi tru long kisim dispela sik. Olgeta lain wantaim gavman i mas luksave na lukautim kamap bilong wan wan bebi long taim mama i gat bel inap long ol i kamap 2 yia long ol i mas kaikai gutpela kaikai wantaim abus, gris, vaitamin na kumu na prut long helpim gutpela gro bilong ol na long kisim gutpela tingting," Mis Brandt i tok.



L-R, Mao Zeming, Minista Fiseris, Ben Micah, Minista Stet On Enteprais, ESP Gavana, Gren Sif, Sir Michael Somare, Prais Minista Peter O'Neill, Gavana Jeneral, Gren Sif, Sir Michael Ogio, Memba bilong Gazelle na nupela Minista bilong Transpot, Malakai Tabar, Patrick Pruaitch, Minista bilong Treseri na Kerenga Kua, Memba bilong Sinasina na pastaim Jastis Minista na Atoni Jeneral. Ol i sanap long kisim poto bihain long Gren Sif i mekim luksave long nupela minista. Ol toktok na poto i kam long Gavman Haus.

Tabar em i Transpot Minista

Gavana Jeneral, Gren Sif Sir Michael Ogio i bin givim luksave long Memba bilong Gazelle, Malakai Tabar, taim em i mekim tok promis bilong em long kisim wok Minista aninit long Ministri bilong Transpot. Dispela tok promis seremoni i bin kamap long Gav-

man Haus long las wik Fraide. Prais Minista Peter O'Neil na ol memba bilong Nesanel Alaiens Pati, wantaim Gren Sif Sir Michael Somare na pastaim Minista bilong Jastis na Atoni Jeneral, Kerenga Kua i bin stap tu long dispela taim.

Foapela memba joinim PNC Pati

PNC Pati gat 56 memba nau

Stanley Nondol i raitim

Pati bilong Prais Minista Peter O'Neill i gat moa memba nau na ol i ken sanap strong na sakim husat i laik kamapim vot i no gat bilip long gavman.

Minista bilong Fainens na lida bilong gavman bisnis James i tok PNC Pati bilong O'Neill i gat bikpela strong long namba na bai stap yet long gavman inap ileksen i kamap long 2017.

Mista Marape i tok 4-pela memba bilong T.H.E Pati i lusim pati na joinim PNC Pati bilong praim minista na apim namba bilong PNC Pati i go antap long 56. Em i moa long simpel majoriti long kamapim gavman.

Mista Marape i tok dispela gavman i mekim planti wok long kantri long givim sevis i go long ol pipel na ol lida husat pipel i makim i gat bilip long O'Neill gavman na i laikim lidasip bilong O'Neill i mas stap yet na wok bung long givim sevis long ol pipel.

Ol 4-pela memba i joinim PNC Pati em, Minista bilong Haia Edukesen na memba bilong Sohe, Delilah Gore, memba bilong Mendi De Kewano, memba bilong Ijivitari, David Arore na Minista bilong Fores Douglas To-

muriesa. Palamen i vot long skruim taim bilong palamen i go long mun Ogas na gavman i win vot 74 na 5-pela tasol i egensim lida bilong gavman bisnis.

Mista Marape i tok dispela vot i kamap em narapela rot long traim namba pawa bilong gavman na kantri i ken lukim klia olsem PNC gat sapot na namba stap long ranim kantri bikos ol pipel yet i makim ol memba long 2012 ileksen.

Mista Marape i tok ol lida bilong kantri i no ken pilai politiks tumas long palamen na i mas lukluk long givims evis long ol pipel.

Em i singaut long ol arapela memba bilong palamen long wok bung wantaim gutpela polisi bilong PNC Pati na givim sevis i go long ol pipel.

Tasol lida bilong T.H.E Pati Don Polye i tok ol 4-pela memba bilong em i no lusim pati na ol i stap yet olsem memba bilong pati.

Em i tok i no gat rot long ol yet bai tokaut long laik bilong ol long joinim narapela pati na tu, ol i no bihainim stretpela rot long kalap go joinim narapel pati.

FARM TRACTORS

- Slashers
- Disc Ploughs
- Disc Harrows
- Post Hole Augers
- Trailers

120hp
90hp
70hp
50hp
40hp

AGMARK MACHINERY

PORT MORESBY: 323 2658 | Digicel: 7215 0333 / 7217 9815
LAE: 472 6324 KOKOPO: 982 8748 | email: machinery@agmark.com.pg

Henao tokaut long helpim narapela

Frieda Sila Kana i raitim

Mis Caroline Henao.

Poto: Frieda Sila Kana

CAROLINE Henao em wanpela meri nau i kamap maus meri bilong PNG Kensa Faundesen long tokaut long hevi i stap insait long sik kensa.

Mis Henao em i memba bilong Bod bilong PNG Kensa Faundesen tasol em yet i gat stori bilong kensa. Em i no sem o pret long tokaut long sik bilong em long Me 8 taim Benk bilong Papua Niugini i holim bikpela moning ti long helpim PNG Kensa Faundesen long pait bilong daunim sik kensa long kantri.

Em i tokim ol narapela olsem em i bin kisim dispela sik kensa tasol em i no pret long sekim bodi na painim. Wantaim sapot bilong famili bilong em, em i kisim helpim hariap na nau em i stap yet long tokaut long ol narapela.

Long Novemba 2012 Caroline Henao i bin sekap long haus sik na dokta i tok em i gat sevikal kensa o kensa long rot bilong bebi. Taim em i save long dispela sik i stap long bodi bilong em, em i hariap long go long Singapore na sekap.

Tasol em i kirap nogut long em i go stap 46 de long kisim kemoterapi na radio terapi, we ol dokta i putim em long masin bilong kilimkukim binatang bilong kensa long bodi bilong em. Samting

olsem 4 o 5 awa em i save sindaun isi tasol na givim taim long masin i wok long bodi bilong em na dispela em i bin hatpela taim tru long em.

Mis Henao i tok, 5-pela de long wanpela wik em i save kisim dispela tupela terapi we em i save mekim bodi bilong em i go slek olgeta na i no gat strong long wokabout. Pastaim long dispela dokta i katim na rausim olgeta bilum bilong bebi.

Sik i mekim em i lusim skin olgeta na ol dispela tritmen i save mekim em i les tru long kaikai. Planti taim em i save airaun tasol na skin bilong em i lus olgeta.

Tasol nau em i orait gen na em

5-pela mun nau bihain long em i go bek long Singapore na ol dokta i tokim em olsem binatang bilong kensa i pinis long bodi bilong em.

Man dispela em i wanpela gutpela nius stret long yau bilong em na famili bilong em. Dispela sik i bin putim bikpela hevi long famili bilong em long painim mani long salim em i go long kisim tritmen.

"Em i bikpela samting long ol meri i mas go hariap long haus sik na sekap sapos ol i pilim sampela hap bilong bodi i gat sua o pen na i no save pinis hariap. Mi amamas olsem mi go long ovasis na mi kisim orait," Mis Henao i tok.

"God bilong mi i bin stap baksait



long mi na bilip bilong mi i givim strong long mi long go yet. Olgeta 3-pela mun mi save go bek long Singapore tasol long Februari 2014 ol dokta i tok mi no gat binatang moa," em i tok.

"Planti taim mi save les tru long go na kisim kemoterapi na radio terapi, tasol pikinini gel bilong mi i save tokim mi, mama em orait yu pasim ai tasol na bai em pinis hariap. Dispela i save givim

mi strong na wantaim laikim bilong mama bilong mi na helpim bilong em, mi winim ol tritmen na nau mi stap gut," Mis Henao i tok.

"Olsem na taim yu kisim sik, yu mas tok save long famili bilong yu na bai yu kisim gutpela sapot," em i tok.

Mis Henao i tok bebi sita bilong em tu i bin dai long taim em i kisim sik kensa long maus. Em yet nau i stap helti na 3-pela taim long wik em i save go wokim ekasesais.

"Kensa em i namba tu bikpela sik i save kilim ol pipel long PNG. I gat ples bilong sekap long kensa long Pot Mosbi Jeneral Haus Sik na Alotau Provinsal Haus Sik. Alotau

i gat masin bilong sekim kensa bikos Milen Bei i save gat planti lain i kisim maus kensa," Dadi Toka Jnr, Sif Eksekutiv Opisa bilong PNG Kensa Faundesen i bin tok.

Mis Linda Babao O'Neill, meri bilong Praim Minista Peter O'Neill i bin stap long dispela taim tu na em i bin krai taim em i harim stori bilong Mis Caroline Henao.

"Ol pipel bilong yumi i save sem long tokaut long maus kensa long pablik. Ol tokples bilong yumi long PNG i no gat wanpela nem bilong kensa. Planti kastom bilong yumi long PNG i no gutpela long helt bilong yumi," Mis Babao i tok.

"Yumi mas stopim pasin bilong tok olsem ol man i posinim yumi taim sik kensa i kisim yumi. Em i wanpela sik i save kamap long kain pasin yumi save gat long kaikai na stap," em i tok.

Mis Linda Babao O'Neill, wantaim Will Genia, bikpela ragbi pi-laia long Australia, i embeseda bilong PNG Kensa Faundesen.

Benk bilong Papua Niugini i bin givim K5,000 long helpim PNG Kensa Faundesen long dispela taim. Na tok save i stap yet olsem husat wanpela grup i laik givim sampela helpim, yu ken holim wanpela 'bikpela moning ti' kibung na singautim ol lain bilong PNG Kensa Faundesen i kam long bung bilong yu.

Koim i askim sapot bilong Australia

I kam long ABC

MAN i bin go pas long Task Fos Swip, Sam Koim, i tok Australia i mas lukluk strong long keis egensim Praim Minista, Peter O'Neill.

Mista Koim, husat i bin bosim Task Force Sweep (TFS), na nau Praim Minista Peter O'Neill i rausim i stap nau long Australia long kisim sapot bilong gavman bilong Australia.


Mista O'Neill i bin kisim wanpela ares waren o oda long las wik bihain long wanpela investigesen em anti korapsen lain, TFS, i bin mekim lusim planti milien Kina i go long baim Paul Paraka Lo kampani. Bihain tasol long dispela waren, praim minista i bin rausim Task Fos Swip.

Mista O'Neill i sakim dispela ol sas, long tok olsem dispela em ol wok kamap bilong ol birua bilong em long wok politik na em i bin rausim Task Fos na Ateni Jeneral na deputi polis komisina long wok bilong ol.

Pastaim Praim Minista Tony Abbott i bin tok ol hevi long wok politik insait long PNG i samting bilong PNG yet.

Tasol insait long intaviu wantaim ABC, Mista Koim i tok Australia i mas putim ai klostu long ol wok painimaut long wanem, planti mani bilong ol pipel bilong Australia husat i save baim takis i lus insait long wok developmen bilong Papua Niugini.

"Australia i save tromoim samting olsem 500 milien dola i go long PNG long wan wan yia. Na hap i save go long Loa na Jastis program bilong kantri," Mista Koim i tok.



Namba wan sikispela LNG kago bilong PNG LNG Projek i lusim graun bilong yumi na i go long ol kastoma long Japan na Taiwan. Mipela i kisim ol tok amamas hia long kantri yet na long ol intenesenel lain. Em i wanpela gutpela taim tru - bilong PNG LNG Projek na bilong Papua Niugini tu.

Oltaim ol lain i save askim mi wanem samting bai senis bihain long konstraksen wok i pinis. Orait, sampela samting bai senis tasol wanpela samting i no inap senis em dispela strongpela tingting bilong mipela long lukim olsem ol komitmen bilong mipela i karim kaikai.

Konstraksen i pinis nau na namba bilong ol wokman na meri tu i kam daun- we bipo i bin gat 21,500 samting, tasol nau namba i kam daun long 1,200. Long sampela wok, ol ovasis wokman i pinis wok na ol lokal wokman i kisim ples long givim moa benefit i go long ol lokal komyuniti na PNG. Mipela i traim long mekim ol dispela senis i kamap gut, we mipela i givim inap taim long toksave long ol woka bipo long ol wok i pinis, na i gat trening long helpim ol i kisim moa save na sans long painim wok long narapela hap.

Komitmen bilong mipela long sefti (No gat wanpela bai kisim bagarap) na trening bai i gohet yet. Sefti long statim ol kain kain masin bilong kamapim LNG, i lukim bikpela wok redi i kamap long seif wok na i gat trening bilong ol wok lain long operesen na mentenens. I bin gat trening long klasrum na ol savelain bilong ol ovasis kantri i kam wok wantaim ol nupela prodaksen wok lain. Bihain taim ol Papua Niugini yet i mekim ol dispela wok. Ol tupela Operesen na Mentenens treni bilong mipela (wan wan i gat 70 yangpela Papua Niugini long en) i mekim gutpela wok nau na mipela i ting bai mipela i kisim liklik lain tasol long 2015.

Bai mipela i lukluk yet long ol nesenel. Sampela Lenona kampani i develop na inap long resis long go insait long ol bisnis, na sapos i gat kwaliti, na saplai i kamap long taim na prais i orait, bai mipela i givim bisnis i go long ol lokal saplaia. Insait long foapela yia bilong konstraksen, mipela i bin spendim samting olsem 10.71 bilien Kina long PNG we 2.64 bilien Kina i go long ol kampani bilong ol papagraun. Planti bilong ol dispela saplaia i bin investim mani bilong ol gen long developim bisnis bilong ol na strongim kastoma na sevis bilong ol bihain long Projek i pinis.

Na las hap toktok, em bihain long planti yia we mipela i tromoi mani i go aut, nau bai mipela i wet long kisim mani long taim mipela i salim LNG na kondenset. Dispela bai lukim ol royalti mani i go long ol papagraun. Gavman i no pinisim yet wok bilong painim na luksave long ol papagraun husat bai kisim dispela mani, tasol mipela i wok long paim dispela mani i go long wanpela tras akaun lon benk bai was long en. Mani bilong Projek i go long Gavman bai i gohet long strongim na groim ikonomi bilong Papua Niugini long bihain taim.

Bai mipela i wok strong yet long kamap gutpela pren wantaim ol komyuniti we mipela i wok long en. Impek bilong mipela long lokal komyuniti bai i no bikpela tumas bikos ol konstraksen wok i pinis, tasol ol komyuniti developmen wok bilong mipela long kepeseti bilding, ol wok bilong helt, edukesen na strongim wok bilong ol meri bai i go het yet, tasol bai i no olsem bipo. Bai mipela i sapotim ol Provinsal Gavman long mekim ol projek i kamap aninit long Infrastraksa Developmen Grent bilong ol.

Mipela i save olsem enejis risos i kamapim planti arapela samting na i no bilong LNG prodaksen tasol-em i karamapim tu developmen bilong ol pipel na save bilong ol, na i kamapim na bai givim gutpela helpim i go long ol lokal komyuniti long planti yia bihain.

Bilip bilong mipela em long kamapim gutpela kontribusen - na bai mipela i go het long mekim olsem.

Gutpela dei.

Mi laik harim tingting bilong yupela, na wanem ol arapela samting yupela i laik ritim long dispela kolum. Plis salim email i kam long pnglngproject@exxonmobil.com

Wokabaut bilong Pop Francis long Holilen i go gut

WOKABAUT bilong Pop Francis i go long Holi Len i bin go gut na ol Israel na Palestain lida wantaim ol sios lida i bin amamas na tok welkam long em.

As tingting long wokabaut bilong Pop Francis tripela wik i go pinis em long bungim ol lida bilong Kristen Otodoks sios na selebretim 50 yia bihain long tupela Kristen lotu i bin sekan na kamapim wanbel pasin. Dispela em bihain ol i save stap birua inap long planti yia insait long histori o ol taim bipo yet.

Narapela samting tu em Pop Francis i bin kisim toktok bilong bel isi na stap gut wantaim i go long pipel bilong rijon.

Long wankain taim tu, Pop

Francis i bin yusim dispela wokabout long toktok strong long spesel poroman we Katolik Sios i gat wantaim Judaisim na ol pipel bilong Israel. Dispela i bin kamap long ples kliia taim Pop Francis i bin bungim ol lida na tu, long bikpela bung we Presiden bilong Israel, Shimon Peres i bin tok welkam long em.

Pop Francis i bin raun i go long banis i brukim Betlehem Dispela i bin givim sans long mausman bilong Israel long dispela hap long mekim kliia watpo dispela banis i stap, na ol wok i kamap long daunim ol bikpela trabel na vailens.

Askim i bin go tu long Pop Francis long Stet bilong

Palestain we ol Katolik na ol narapela Kristen long Betlehem na ol arapela eria long Palestain na Is Jerusalem i lukim olsem ol i stap insait long en.

I gat planti Katolik pipel nau stap namel long Jordan na Mediterenien husat i sitisen bilong Israel na moa yet, Kristientiti i wok long gro long Israel taim em i wok long go daun long Midel Is.

Long wankain taim, Katolik Sios i wok long gro hariap na bikpela moa nau.

Ol ripot i kam long Vatiken i soim olsem nau i gat 1.229 bilien Katolik long wol i kisim Sakramen bilong Baptismo. Dispela em 10 pesen i go antap moa bihain long ripot bilong yia 2005.

Pater John Lee i kisim nupela wok long Tailan

WANPELA SVD Katolik pater bilong kantri Vietnam i lusim PNG long go wok long Tailan, Esia.

Pater John Lee SVD i bin wok long Dirima Peris, long Simbu Provsins we em bin wok inap 10-pela yia i bin lusim PNG long las mun na go kisim nupela wok long Tailan.

Tupela yia bihain tasol long odinesen bilong em long 2002,

ol bin salim em i kam long PNG na Dirima Peris long Simbu Daiosis long wok olsem misinari pater.

"Mi amamas long wok wantaim ol pipel long dispela kantri. Ol pipel long peris na daiosis i save wok bung gut wantaim long wok bilong sios na givim mi gutpela sapot. Mi go bek wantaim amamas olsem ol pipel bai

skruim gutpela wok na givim sapot long nupela pater," Pater John i tok.

Pater John i lusim PNG bihain ol i bin selebretim 50 krismas bilong Dirima Peris.

Em i save gut tru long Tok Pisin na sapos husat manmeri i go long Tailan o Vietnam long ol yia i kam, bai yu save olsem wanpela wantok yu ken Tok Pisin wantaim i stap long hap.



TUPELA PORO: Pater John Lee SVD na Pater Macianus Bei SVD em tupela poroman i bin wok wantaim long Dirima Peris, Simbu taim ol i kam pastaim long PNG long yia 2002. Nau Pater Macianus i wok long Sen Peter Chanel Peris, Erima long Mosbi na Pater John i bin stap bek na wok long Dirima. Tasol nau em i lusim Dirima na PNG na go long Tailan. Tupela wanwok i bin bung wantaim long taim bilong opim nupela haus lotu bilong Sen Peter Chanel haus lotu long las mun. **Poto: Veronica Hatutasi**



KLINAP: Sampela ACYC yut i klinim Cheshire Disabiliti Senta eria.

Poto: Sandra Amuru




INVESTMENT TOKTOK with MICHAEL BLOCK

Nambawan Super i save putim ol mani bilong ol memba long wanem hap?

(Tenkyu long David bilong Trobrian Ailan long askim dispela kwesten)

Sapos yu gat sampela askim plis salim i kam long toktoksuper@nambawansuper.com.pg na mipela bai bekim long yu.

Invesmen potfolio bilong Nambawan Super em i wanpela bikpela tru na i nambawan stret insait long Papua Niugini.

NSL i save putim samting olsem 4.2 bilien kina bilong ol memba bilong en long invesmen. Wanpela hap bilong invesmen i stap tasol long kes mani na gavman bon, na namba 2 hap i stap insait long sea bilong ol PNG kampani na namba 3 hap i stap insait long ol propeti na aset long ovasis.

Dispela kain miks invesmen em i no narapela olgeta long olpela pasin bilong invesmen ol i save bihainim long bipo yet.

Aset Alokesen edvais bilong bipo tru we i stap long rekot yumi ken lukim em i kam yet long taim bilong baibel na em i tok: "Larim olgeta man i mas brukim mani bilong ol i go long tripela hap, na putim wanpela hap long graun, narapela hap igo long bisnis, na holim wanpela hap bilong bihain."

Hia em nem bilong sampela kampani long Papua Niugini we NSL i save baim ol sea invesmen.



Sampela invesmen bilong Nambawan Super Limited invesmen i stap insait long ol praivet kampani. Sampela bilong ol dispela kampani ino stap long lista bilong stok eksens na ol i no gat nupela sea, olsem na i no gat narapela kampani i save baim sea long ol, em Nambawan Super tasol i gat bikpela potfolio wantaim ol dispela kampani.

Mipela i bilip olsem invesmen potfolio bilong mipela em i nambawan long PNG na mipela i gat strongpela tingting long ol memba bilong mipela bai kisim gutpela na strongpela winmani bilong ol long planti yia i kam bihain.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER, STRONGER AND STILL NUMBER 1

5th Melanesian Festival of Arts na Kalsa



Taim bilong soim pasim Tumbuna Jun 28 - Julai 11, 2014





Minista tok festival bai kamap gut

...nogat pret o wari

Papua Niugini bai mekim bikpela welkam long ol brata susa bilong yumi long Melanesian kantri long dispela wik Sarere 28 Jun 2014.

Bai olgeta kantri husat i kamap long Mosbi long dispela wik bai bung long Ungagi pilai graun long Godons long 5 kilok apinun na bai pulim lain go long bikpela pilai graun long Sir John Guise Stadium. Ol kantri em, Vanuatu, Solomon Ailan, Fiji, Nu Kaledonia, Wes Papua na Moloku long Indonesia na Timor Lesta na Tores Treit long Australia. Wantaim tu em ol wanwan provins bilong Papua Niugini.

Olgeta bai bung long Sir John Guise Stadium long kisim bikpela tok welkam bilong ol lida bilong Papua Niugini olsem Gavana bilong NCD Powes Parkop, Minista bilong Kalsa na Turism Boka Kondra na Prais Minista bilong Papua Niugini Peter O'Neill.

Prais Minista Peter O'Neill bai opim dispela namba 5 Melanesian Festival ov Ats na Kalsa long dispela taim we bai ron go inap long 11 Julai, 2014. Opisel program i stap pinis long beksait bilong dispela saplimen (pes 20).

Long Tude dispela wik, Minista Kondra i tokim ol Minista na lida bilong ol

Melanesian kantri husat bin kamap pas long miting olsem PNG i redi tru long lukautim dispela festival.

Mista Kondra i tok ol brata susa bilong yumi mas pilim fri na amamas bikos bai yumi olgeta amamas wantaim go inap long taim bilong festival i pinis.

Em tok maski yumi harim ol ritim ol stori long sampela nois long Pot Mosbi long dispela wik, dispela i no stopim festival long go het. Gavman i kontrol na go pas long lukim olsem olgeta samting bai ron gut na olgeta lain bilong yumi husat i kam long narapela kantri bai stap gut na amamasim kalsa na pasin tumbuna bilong ol wantaim mipela long PNG.

Ol polis bai mekim wok bilong ol was gut long yumi olgeta i amamas wantaim, em i tok.

Minista i tok Gavman bilong PNG i sanap wantaim na sapot strong long dispela festival mas kamap na bai ron gut olsem na em givim bikpela sapot tru long stat bilong stretim ples na mekim olgeta samting i kamap gut inap nau.

Em tok ples bilong festival i redi pinis na nau em taim bilong soim eksen nau olsem na nau yet em yumi laik tingting kalsa, toktok kalsa, slip kalsa na mekim olgeta eksen bilong yumi long pasin kalsa bilong yumi.



MSG kisim bikpela sapot long PNG Gavman

PAPUA Niugini Gavman i soim bikpela sapot tru long wok bilong strongim pasin tumbuna na kalsa insait long ol Melanesian kantri wantaim K1.2 milien.

Siaman bilong Melanesian Spiahet Grup (MSG) na Minista bilong Ats na Kalsa Miting bilong Nu Kaledonia Mista Yvon Fua i tokaut long dispela sapot na mekim bikpela tok tenkyu tru long Papua Niugini Gavman long Tunde dispela wik.

Mista Fua i tok em bin amamas tru long olpela Prais Minista bilong Papua Niugini Paias Wingti husat bin Prais Minista long 1988 we ol bin strongim tok-tok insait long MSG bung long kamapim kain festival bilong strongim kalsa na pasin tumbuna bilong yumi. Disisen bilong MSG long dispela taim i kamap tru na olsem foapela taim nau yumi wok long amamasim na soim ol kalsa bilong yumi raun namel long ol dispela Melanesian kantri.

Nu Kaledonia bin lukautim namba 4 Melanesian Festival ov Ats na Kalsa long 2010 na nau em taim bilong Papua Niugini bihain long foapela krismas. Vanuatu bin statim long 2002 na bihainim em Solomon Ailans long 2006.

Mista Fua i tok em i save olsem dispela namba 5 festival bai bikpela bikos long namba bilong ol lain bai kam long Papua Niugini bai bikpela tru na ol pasin na ol samting bai ol soim na kamapim bai planti na bikpela moa.

Long dispela em mekim bikpela tok amamas go long Gavman bilong PNG, Minista bilong Kalsa na Turism Mista Boka Kondra na opis bilong Nesenel Kalsarel Komisn (NCC) Ektng Eke-sekyutiv Dairekta Dokta Jacob Simet na ol wokman bilong em.

Siaman bilong MSG Ats na Kalsa Kaunsel long Nu Kaledonia Charles Wea

tu i mekim bikpela tok tenkyu na amamas makim kantri bilong em long Papua Niugini long kisim ol i kam long dispela namba 5 Melanesian Festival ov Ats na Kalsa hia long Pot Mosbi.

Mista Wea i tok festival nau i kamap long raunim gen ol Melanesian kantri bikos PNG em las nau. Olsem na em taim bilong ol MSG lida long paitim toktok na makim wanem kantri bai lukautim namba 6 festival long 2018.

Em i tok ol lain bilong em bai kam hia long PNG wantaim bikpela namba mak long 200 lain olgeta we ol bai putim aut ol singsing na danis, kainkain stail samting ol save wokim long ples na yusim na planti arapela moa. Em tok kam tasol long festival graun na bai yu ken lukim stail bilong ol Nu Kaledonia.

Long Trinde moning em ol kantri olsem Fiji, Nu Kaledonia na Solomon Ailan i kamap pinis long Mosbi na go long ol banis bilong ol we ol bai stap long en na go kam long festival insait long tupela wik long Mosbi.

Arapela kantri olsem Vanuatu, tripela provins bilong Indonesia na Tores Treit bilong Australia i kam long Fonde na Fraide long dispela wik.

Long dispela wik Trinde em ol lida na Minista bilong Melanesian kantri insait long dispela MSG i bin holim bung bilong ol long mekim plen na arapela toktok bilong strongim pasin tumbuna na kalsa bilong yumi. Ol i lukluk tu long ol arapela rot bilong holim yet na kirapim long sait bilong bisnis we ol manmeri ken mekim mani long save na hat wok bilong ol long ats na.

Ol i toktok tu long wanem kantri bai lukautim namba 6 Melanesian Festival ov Ats na Kalsa long 2018 we bai yumi kisim toksave bihain.



Stori bilong Melanesian Festival ov Ats na Kalsa

Melanesian Spiahet Grup (MSG) i bin kamapim namba wan miting namel long ol lida bilong Solomon Ailands, Vanuatu, Papua Niugini na Kanakyy politikel grup bilong Nu Kaledonia long 1984 long Solomon Ailans. Bihain long dispela Fiji bin joinim na kamap memba bilong MSG long 14 Mas 1999, ol lida bin sainim wanpela bikpela agrimen ol kolim Agrimen Prinsipols ov Kopresen namel long Independen Stets ov Melanesia.

Bihainim dispela agrimen ol MSG memba kantri i lukim olsem kalsa mas stap insait long olgeta wok bung bilong ol long karimaut ol tingting na plen bilong ol. Olsem na long 1994 MSG samit long Solomon Ailans, ol wanbel long kamap Melanesian Ats na Kalsa Festival long olgeta 4-pela yia namel long ol dispela Melansia kantri. Bihain long 1995 olgeta het bilong Kalsarel Grup bin bung long Vanuatu na pasim dispela tingting we i sapotim dispela agrimen bilong MSG.

Ol MSG lida i luksave olsem ol Kalsa bilong Melanesian kantri i wok long bungim hevi nau bikos long ol ausait pasin na stail we i wok long kam insait long kantri. Olsem na i mas gat wok bilong strongim na holim strong kalsa bilong yumi na lukautim gut na tu soim aut long ol festival o so olgeta taim. Long dispela olgeta Melanesian kantri mas sanap na sapot wantam long mekim ol dispela samting long holim strong na promotim ol ats na kalsa bilong yumi.


Ol memba kantri i lukim olsem yumi ol Melanesia kantri i gat bikpela pasin tumbuna long ats na kalsa insait long wol na yumi wok long holim na strongim yet. Yumi save bihainim yet na strongim pasin kalsa bilong yumi long olgeta provins na wanwan asples bilong yumi olsem na yumi mas sapotim na soim insait long sampela kain pilai o so. Ol strongim tok tu olsem ol memba kantri mas senisim ol tingting, aidia, ol save manmeri, holim ol woksop miting na konfrens insait long rijon bilong yumi.

Ol Melanesian kantri i stap long Westen Pasifik na i kisim bikpela luksave long ol planti pasin tumbuna na kalsa bilong ol. Ol pasin tumbuna na kalsa bilong ol i bungim tru ol pipel bilong ol wantaim. Dispela tu i mekim ol i sanap klia long ai bilong ol arapela kantri long wol olsem em ol Melanesian pipel.

Ol dispela kantri bilong Melansia olsem Papua Niugini, Fiji, Solomon Ailans, Vanuatu na Nu Kaledonia i soim aut tru pasin bilong ol, ol ats na kalsa bilong ol we planti bilong ol dispela samting nau i gat pret long bai pundaun o bungim hevi bikos long ol nupela pasin na ol samting we i kam long ausait kantri long wol.

Olsem na ol Melensian Spiahet Grup (MSG) lida i strongim tok long kamapim Melanesian Festival ov Ats na Kalsa olsem wanpela rot bilong holim na strongim na promotim dispela ol pasin na kalasa bilong yumi.

Olsem na long 1998 namba wan Melanesian Festival ov Ats na Kalsa so bin kamap long Solomon Ailan na bihain Vanuatu i lukautim long 2002 na Fiji long 2006. Long 2010 em Nu Kaledonia bin lukautim namba 4 Melesian Festival ov Ats na Kalsa na inap nau em taim bilong



Papua Niugini long dispela yia 2014. Festival ya i bringim na soim klia olsem Melanesian Atis long soim kalsa na ats bilong ol wantaim tu ol tumbuna pasin na

ol musik, danis na singsing na ol disian piksa na ats.

Long dispela namba 5 Melanesian Festival ov Ats na Kalsa em Papua Niug-

ini bai lukautim aninit long nem Selebretting Kalsarel Daivesiti. Papua Niugini gavman bin wanbel long lukautim dispela festival long Epril dispela yia.



Wok redi long Melanisen Ats Festival

LONG tupela wik long mun Jun na Julai long dispela yia, PNG bai lukim ol kain kain kalsa na tumbuna pasin bilong ol Melanisen kantri brata na susa bilong yumi.

Dispela em taim ol kantri olsem Solomon Ailan, Vanuatu, Fiji, PNG na tu, Timor Leste, Wes Papua na Nu Kaledonia, i holim tupela wik na namba 5 Melanisen Ats Festival (MAF) long PNG.

Festival bai i no kamap long Mosbi tasol, nogat. Em bai kamap tu long ol arapela ples olsem Alotau long Milen Be, Kokopo long Is Nu Briten, Wewak long Is Sepik na Goroka long Isten Hailans Provins.

Taim i wok long kam klostu na ol dispela 6-pela provins i mekim ol wok redi long holim MAF.

Long festival, ol pipel bai soim ol kalsa, tumbuna pasin, ol singsing danis, ol stori, ol henkraf na moa.

Long dispela taim ol wan wan kantri i ken glasim ol kalsa na pasin tumbuna bilong wanpela narapela tu.

Long las wik, Alotau i bin lonsim Sauten Rijon satelait hap we ol bai holim MAF long en long Milen Be Provins na Minista bilong Turisim na Kalsa, Boka Kondrea i bin opim.

Mista Kondra i bin tok amamas long Gavana bilong Milen Be, Titus Philemon,

na pipel bilong em long tok yesa olsem wanpela satelait ples we MAF bai kamap long en.

Mista Philemon i bin autim tok amamas long minista i makim Alotau long lonsim festival na em bin tok tu olsem Milen Be i wok long kamap olsem wanpela turis kapital bilong PNG.

Dispela em bihain nesanel gavman i bin wokim disisen long las yia long makim Milen Be Provins long ol turis sip i go long en.

I kam inap nau, Alotau, Kaibola, Kitava na Doini i lukim samting olsem 10,000 turis i kamap long ol ailan bilong ol.


Long wankain taim, ol lain long Aroma

Kos, Sentral Provins i redim ol kanu bilong ol ol i kolim long mong bilong karim ol bikman bilong Melanisen Spiahet Grup (MSG) long statim festival.

Ol i kisim ol dispela kanu i kam pinis long Gerehu insait long Mosbi siti long vanisim na stretim ol gut long redi long festival.

Wanpela yut grup bilong Aroma Kos yet i wok long dispela ol kanu. Pe bilong wokim wanpela kanu em K4,000.

Long Mosbi tu, ol i redim ples bilong holim festival na ol i wok long sanapim ol haus na ol narapela samting long Waigani, klostu long Palamen we ol ekivitivi bai kamap.



Poto i soim ol kain tumbuna haus long PNG. **Poto: Nicky Bernard**



KAVING: Wanpela atis man bilong Galp Provins i wokim kaving na droing. Ol bai soim planti kain kaving na henkraf olsem long festival. **Poto: Nicky Bernard**



Ol poto i soim mong o kanu we ol Aroma Kos yut i wokim. Klostu ol i pinis long wokim ol, olsem poto i soim. **Poto: NCCMidia**



Ol skul pikinini long Alotau, Milen Be i redi long danis long taim bilong lonsim ol satelait ples long holim MAF las wik. **Poto: NCCMidia**

Senisim Seksen 145 bai strongim

demokresi o kamapim diktetasip long PNG

Dispela wik ol pipel bilong Papua Niugini i lukim gen narapela eksampel bilong wanem kain gavman kantri bai lukim sapos ol memba bilong Palamen i bung na givim tok orait long senisim Seksen 145 bilong konstitusen o mama lo bilong kantri.

Sapos dispela senis i kamap bai i no gat moa vot i no gat bilip long gavman. Long taim nupela gavman i kamap bihain long ileksen bai dispela gavman i holim pawa inap long narapela nesanel ileksen i kamap gen. Dispela senis bai kilim indai wanem kain oposisen i stap nau long palamen na bai kamapim wanpela dikteta gavman. I no gat narapela wei long traim tok klia long wanem samting dispela senis inap kamapim. Bai PNG i no inap tok em i demikretik kantri moa. Ol pipel bai i no gat pawa na i no gat maus long palamen sapos memba bilong ol i no stap long gavman.

Dispela plen bilong gavman long senisim Seksen 145 bilong konstitusen em i bikpela samting tru na ol pipel i mas gat sans long paitim toktok na glasim ol narapela rot bilong strongim gavman. Yumi no mas aipas o maus pas na bihainim laik bilong gavman tude na mekim nating ol senis.

Wanem kain senis palamen i mekim i mas putim gutpela sindaun bilong ol pipel i go pas. No ken senisim konstitusen bilong strongim pawa bilong tude tasol na bagarapim demokresi bilong Papua Niugini.

I mas gat moa toksave i go aut long ol pipel. Tok klia na tokaut long pablik na givim taim long ol pipel i autim tingting bilong ol. Maski long hariapim ol memba



Jada 014

tasol long senisim lo. I mas gat wanpela independen grup husat i gat rispek bilong komyniti i mekim wok bilong kisim tingting bilong ol pipel. Senisim konstitusen

em i bikpela samting tru olsem na ol pipel i mas gat sans long lukim wanem kain senis tru gavman i laik kamapim na autim tingting bilong ol tu.

Tasol tude kantri bilong yumi klostu i winim 40 yia nau na save i kilim yumi wansait stret. I gat kain kaina loya na ol saveman na meri bilong wok politik na i gat planti ol

Yumi lukluk bek long wok bilong Konstitusene Plening Komiti (CPC) bipo long self gavman na independens. Ol memba bilong dispela komiti i bin raun long olgeta kona bilong PNG na kisim tingting bilong ol pipel. Olsem na yumi ken tok, ol pipel bilong PNG yet i bin tokaut long wanem kain gavman na lo ol i laikim. Wok bilong CPC i bin kamap bipo long planti pipel bilong yumi i save long rit na rait long tok Inglis. Long dispela taim tu i no gat planti Papua Niugini man o meri i winim bikpela skul long yuni-vesiti. Tasol ol papamama na tumbuna bilong yumi i bilip long gutpela bilong kantri long bihain taim, olsem na ol i wanbel long kantri i mas gat strongpela konstitusen na gutpela demokretik gavman wankain olsem Wesminsta Palamentri Demokresi. Aninit long dispela sistem, ol pipel i votim ol memba bilong palamen na ol memba i fri long autim tingting bilong ol na ol i fri long vot long palamen. I gat ol memba bilong gavman na i gat strongpela oposisen tu.

konman tu i stap namel long ol dispela savelain. Palamen em i haus bilong ol pipel. Namba wan wok bilong dispela haus em long kamapim ol gutpela lo bilong lukautim sindaun bilong ol pipel. Palamen i no bilong wanpela politikal pati o wanpela liklik grup bilong ol memba. Tasol tude ol pipel i lukim dispela pasin i strong tru long palamen. Pawa i stap long han bilong wanpela grup tasol, ol memba i no inap long opim maus moa na salensim gavman sapos ol i no wanbel. Ol i save olsem sapos ol i opim maus, bai ol i no inap long kisim mani bilong ilektoret bilong ol. Dispela kain pasin bilong ranim kantri i no trupela rot bilong wanpela demokretik kantri i bihainim.

Nau em i taim bilong senisim dispela pasin bilong ol memba i hariap long kamapim senis long konstitusen.

Oposisen i no gat inap memba long salensim gavman. Ol memba bilong yumi i mas tokaut long pablik long as bilong senis na givim taim na sans long ol pipel tu i givim tingting bilong ol.

Ol yangpela pipel bilong dispela kantri i mas klia long as bilong dispela hap tok, demokresi. Sapos yumi gat ol trupela lida, orait wanem senis ol i laik kamapim long konstitusen i mas kamap long gutpela sindaun bilong kantri long bihain taim.

Ol memba i no ken lusim tingting olsem long 40 yia bihain, dispela senis ol i laik kamapim nau long Seksen 145 bilong konstitusen, bai kamapim wanpela strongpela demokretik gavman long Papua Niugini, o nogut i abrus na kamapim namba wan dikteta gavman bilong Pasifik.

Glasm gut ol wok Gavman i kamapim

PRAIM Minista Peter O'Neill tok em no inap risain long ol kain kain tok-tok na singaut i kam long Oposisen na husat ol Bikman na pablik long dispela wik.

Yumi save pinis olsem las wik ol polisman bin laik givim wanpela waren ov ares pepa long Mista O'Neill mas go long polis stesin long bekim ol askim bilong polis bikos long K71.8 milien Gavman bin baim i go long biknem loya kampani ol kolim Paraka Loyas. Polis i bin kisim pepa i kam long Task Fos Swip Tim husat bin sekim olgeta rekot na wok painimaut i ting Mista O'Neill bin givim tok orait long baim dispela lo kampani ya. Polis Komisina Tom Kulunga bin sainim pepa we i oraitim ol polisman long askim kwesten long Praim Minista. Nau Praim Minista bin kisim wanpela kot pepa pinis long stopim polis long no ken kisim em go na askim em o go long kot long mekim klia long sanap bilong em insait long dispela samting.

Plantitoktok go kam pinis



long Praim Mnista i mas risain o lusim opis na stap aut na kliaim em gut long dispela samting.

Tasol Praim Minista i sanap strong olsem em no inap risain o lusim opis bikos em ting planti hait pasin na sait wok em ol gavman opisa wantaim ol polisman na opis bilong Tas Fos Swip na Oposisen memba bin kamap wantaim kain rot olsem long daunim na bagarapim Praim Minista na Gavman bilong kantri.

Long dispela as em i rausim Minista bilong Jastis na Atoni Jenerel Kerenga Kua, rausim bos bilong Tas Fos Swip Sam Koim na long wankain taim tu, Ekting Polis Komisina Geoffery Vaki i rausim (saspen) ol polisman husat bin traim long kwestenim Praim Minista.

Tasol yumi lukim tu olsem ol Minista na lida bilong palamen i sanap strong yet wantaim Praim Minista Peter

O'Neill tude. Bikpela tingting em ol tok dispela Gavman em yumi ken lukim ol wok na senis i kamap long ol ilektoret na provins na kantri olgeta.

Gavana bilong NCD, Powes Parkop i tok NCD nau i lukim planti bikpela developmen na senis bikos dispela Gavman i givim mani na sapot long ol wok mas kamap. Long dispela as NCD i lukim planti bikpela developmen na senis tude.

Memba bilong Yangoru Sausia na Minista bilong Tred Komes na Industri Richard Maru tu i tok strong olsem ilektoret bilong em i no save lukim wanpela gutpela sevis na developmen long bipo i kam inap nau dispela Gavman i stat long givimaut mani. Nau ol memba gat mani bilong mekim wok insait long ol ilektret bilong ol. Long dispela as ol i sapotim yet dispela Praim Minista.

Lida bilong Nesanel Alaiens (NA) Pati Patrick Pruaitch tu i tok pati bilong em i sanap wantaim dispela Praim Minista na Gavman

bikos ol i holim yet wanbel na agrimen ol bin sainim long Alotau taim ol bin sanap wantaim long statim Gavman long 2012.

Dispela toktok bilong K71.8 milien peimen bilong loya kampani ya em i no long asde tasol. Em bin stap bipo long ol olpela Gavman inap long taim Peter O'Neill bin kamap Praim Minista long 2012. Bilong wanem na olpela Gavman i no laik stretim dispela samting long bipo yet we ol i stopim peimen o mekim peimen. Nau dispela i kamap olsem wanpela sap huk stret we i kisim Mista O'Neill stret na nau kain kain toktok na planti salens i kamap tude.

Disisen bilong Gavman long rausim opis bilong Tas Fos Swip tu em no gutpela stret bikos kain opis olsem i mas stap long sekim ol lida na ol opisa long wok bilong ol na kotim ol bikos PNG em yumi save olsem planti paul na stil pasin i save kamap. Nau opis ya i pas nau na pabliki gat planti tingting krangki nau long dispela Gavman.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579 Email: editorial@wantok.com.pg Websait: www.wantokniuspapa.com Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga
Editor
Veronica Hatutasi
Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Ol poto long wiken



SISENEL WOKA: Wanpela long ol woka bilong ol Pasifik Ailan kantri insait long Sinesenel Wokas Progreem bilong Australia i pikim ol prut long wanpela fam long rurel Victoria, Australia. *Poto: ABC*



BOANA MAKET: Ol mama na pikinini i bisi maket i stap long Boana Maket, Morobe Provins. *Poto: Bustin Anzu*



NAISPELA PIKSA : Solwara i stap isi stret na no gat man tu i raun, na motobot tu i slip wetim papa bilong em i stap.

Raun wantaim Kanage olgeta wik

Em faul bodi meri ya

TAIM Kanage i liklik boi yet, papa bilong em i save kisim em i go raun long Ela Bis long Mosbi. Wanpela taim em wantaim papa i go raun i stap na lukim wanpela geligeli man (ol man husat i save luk olsem ol meri) i wokabaut i kam. Dispela man tu i bilong Hanuabada na em i stailim stret wokabaut bilong em. Boi sakim as na wokabaut olsem wanpela pato stret. Taim Kanage i lukim olsem, em i ting olsem wanpela meri na askim papa bilong em Yendefande, "Hei papa, dispela meri i luk narakain stret ya?" em i no gat susu olsem bilong mama. Ating em i mas gat sik ya." Kwik taim tru papa bilong em i sarapim em na tok, "Pasim maus bilong yu, yu liklik tumas



na yu no save. Dispela kain meri ol i save kolim ol faul bodi. Ol tewel bilong Papua i wokim ol krange long taim bilong ren stret, olsem na em i nogat susu. Ol tewel i wokim em long haphap samting bilong ol man, meri na enimol bilong bikbus. Dispela kain meri i no save pispis na pekpek." Kanage i harim dispela na bilipim stret papa bilong em.

Dodo na Chester Kila
Wan Mail-LAE.

Planti Refrens musik tumas

WANPELA Fraide nait Kanage pilai laki wantaim ol wantok bilong em long Sandaun kem long Madang. Long wankain taim tu i gat danis long Raikos kem. Kanage pilai laki go na harim olsem ol musik tasol i wok long kamap long danis. Kanage harim dispela ol wankain musik i go na belhat nogut tru. Em nau em kirap na tok "Yupela, ol Raikos ya wok long pilaim tasol ol referens musik bilong ol, na ai bilong mi laik silip nau." Ol wantok bilong em harim olsem na kaikaim graun. Bikos Kanage i laik tok feveret na em i abrus na tok referens.

George Mango
Sandaun Kem-WEWAK.

Ol skwat! Teksim ol gutpela Kanage tok pilai i kam long: Txt: 72356149

Pasin i no gutpela i wok long bagarapim skul bilong mi

Dia Laipain,

MI WANPELA skul mangi i gat 17 krismas husat i wokim Gret 12 long wanpela nesanel hai skul. Mi laik greduet o pinisim gut skul na go long yunivesiti.

Papamama bilong mi i divos o brukim marit, na papa i marit pinis na i gat wanpela pikinini. Mi save stap wantaim mama husat i stap em yet na i no marit. Susa na brata bilong mi i save stap wantaim mipela, tasol tupela i marit pinis na ol i gat ol pikinini bilong ol i stap wantaim mipela tu.

Wari bilong mi em, stat yet papamama bilong mi i brukim marit, mi no save mekim gut ol skul wok bilong mi.

Nau mi save smok na dring na sindaun stori wantaim ol strit lain na ol neiba i go inap let tru long nait na go bek long haus.

Ol papamama bilong mi i bisi long ol wok bilong ol, na ol i no save bisi long mi. Ol i save givim poket mani long mi tasol, ol i nogat taim long toktok wantaim mi. Yu ting mi ken mekim gut long skul sapos mi stopim ol bikhet pasin bilong smok na dring? Mi wari na mi laikim helpim.

WORRIED STUDENT

Dia Pren,

Mipela i amamas olsem yu kam long Laipain long serim wari bilong yu long marit i bruk i kaampim hevi long skul na laip bilong yu.

Mipela i luksave olsem em i hat long ol pikinini long go het gut long laip wantaim ol kain famili na sosel hevi olsem.

Long tude, planti pikinini i wok long bungim wankain hevi olsem yu na dispela i kamap long wanem, ol kain pasin bilong ausait i kam insait, man i gat planti samting i



mekim man i ting olsem em i gutpela moa long narapela o i gat sans long traim tupela wantaim. Dispela i mekim wanpela i ting olsem ol i gat sans long ol nupela samting we bai mekim ol i gat moa luksave namel long ol wanlain bilong ol.

I moabeta yu toktok wantaim ol papamama bilong yu long ol wari yu gat bikos mipela i lukim olsem tupela wantaim i wari long yu na ol i save givim yu poket mani.

Yu inap kamap olsem bris lon g tupela papamama i stretim hevi ol i gat. Planti pikinini tude i bungim dispela hevi taim ol i stap namel long hevi bilong papamama bilong ol.

Yu toktok tu long ol susa na brata bilong yu i marit pinis, tasol ol na ol pikinini na man bilong ol i stap yet long haus bilong papa na yupela olgeta wantaim. Yu tok dispela i save kamapim tu hevi.

I moabeta long yupela i singautim wanpela famili bung na toktok wantaim long ol dispela wari na hevi. Mipela i bilip olsem kain bung toktok i ken daunim sampela ol wari na hevi insait long famili.

Pren, kisim smok, drag na strongpela dring i no inap helpim yu, o helpim long stretim hevi bilong papamama, tasol bai givim yu moa hevi na wari. Na i no inap helpim yu long ol gutpela samting yu laik mekim.

I moabeta yu stopim pasin bilong smok na kisim strongpela dring na lukluk long bihainim ol gutpela pasin. Bai yu kamap gutpela man

sapos yu stap wantaim ol famili lain bilong yu moa na totkok na mekim long ol ol samting we bai helpim yu na papamama bilong yu.

I moabeta yu mekim ol samting na stretim laip bilong yu. i maobeta tu yu lusim pasin bilong ol strit manki na stap moa na toktok wantaim papamama na ol bikpela brata na susa long stretim ol hevi yupela i gat olsem famili.

Pren, bihain taim bilong yu i stap long han bilong yu. Senisim tasol pasin bai helpim yu kamap gutpela man long bihain taim.

Em i no helti long sutim tok long papamama long ol hevi yu bungim long en. Komplon na mekim ol samting bai bagarapim yu i no inap kamapim wanpela gutpela samting long yu. Yu mas mekim samting nau na bihain taim bilong yu i ken gutpela.

I moabeta yu painim ol gutpela poroman husat i ken helpim yu senisim pasin na kamap gutpela man. I moabeta yu painim taim long lukim na toktok wantaim skul saplen o skripjas yunien lida we i ken givim yu sampela tok stia long yu.

Bikpela i ken givim yu strong na gutpela save

Pren bilong yu, Laipain.

Sapos yu gat wari o hevi, rait i kam long dispela etres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.
Laipain

PNG redi long 5th Melanesian Festival ov Ats

...taim bilong soim pasin tumbuna na kalsa

FAIVPELA Melanesian kantri bai soim tru kala na pasin tumbuna bilong ol long namba 5 Melanesian Festival ov Ats long Mosbi long dispela wiken.

Antap long dispela ol arapela wantok na famili bai kam tu long ol kantri olsem Australia na Indonesia long join wantaim yumi long dispela bikpela festival.

Ripot i kam long opis bilong Nesenel Kalsarel Komisn (NCC) i tokaut olsem ol wansolwara kantri bai kamap long dispela festival em; Fiji, Vanuatu, Solomon Ailan na Nu Kaledonia. Long Indonesia em ol wanpinis provins long Wes Papua na Moloku na Timor Lesta na Tores Trait long Australia.

Long Papua Niugini yet em planti provins bilong yumi i stap pinis long soim kalsa na tumbuna pasin bilong ol tu long dispela taim.

NCC ripot i tok olsem dispela em wanpela festival we i save kamap olgeta 4-pela krismas raun long olgeta wansolwara kantri na dispela yia em taim bilong Papua Niugini long lukautim.

Foapela krismas go pinis em Nu Kaledonia i bin lukautim dispela festival we Papua Niugini bin salim ol atis manmeri go long soim ol tumbuna pasin bilong yumi long singsing danis long kundu, garamut, mambu, tavor na bilas wantaim purpur, pasim malo, tanget na kainkain bilas bilong yumi. Ol bin go soim tu ol kainkain han na stail bilong yumi long wokim kaving, ston sospen, bilas, bilum, kanu, haus na kainkain pasin tumbuna bilong yumi.

2014 em taim bilong Papua Niugini long lukautim festival we bai kamap long Waigani Independens Pak long fran bilong Nesenel Haus Palamen.

Planti lain bilong Papua Niugini i lusim ples na provins bilong ol pinis na kamap long Mosbii na redim ol long kamautim wanem samting ol redim long dispela bikpela de bilong festiivol. Wankain tu ol brata susa bilong yumi long wansolwara tu bai kam wantaim ol pasin tumbuna na stail bilong ol we yumi tu ken lukim na amamas wantaim long pasin tumbuna na kalsa bilong yumi long Pasifik na Melanesia.



Kalsa i bungim yumi ol wansolwara kantri wantaim

BIKPELA samting we i save bungim Papua Niugini wantaim ol arapela Melanesia brata na susa em bikos yumi stap klostu klostu long hap. Tasol wanem samting i soim yumi klia long narapela narapela em long pasin tumbuna o kalsa bilong yumi. Dispela em toktok bilong Eksekyutiv Dairekta bilong Nesenel Kalsarel Komisn Dokta Jacob Simet taim Praim Minista Peter O'Neill i opim namba 5 Melanesian Festival ov Ats long las mun long Mosbi.

Ol lida husat i bin kamapim

Memorandum ov Agrimen (wanbel pepa) i save gut long dispela.

Dokta Simet i tok insait long ol yia i go pinis, sampela gutpela senis i bin kamap long sait bilong Melanesian Spiahhet Grup (MSG) long sait bilong wok bung wantaim insait long politiks. Wankain tu mipela long sait bilong kalsa i wok long kamapim gutpela senis tu. Wanpela long ol gutpela senis ya em Rijnol agrimen long banisim na was gut long ol save bilong yumi long pasin tumbuna na kalsa.

Em i tok Melanesian Festival ov Ats na Kalsa em wanpela bikpela samting tru long yumi holim yet na banisim gut ol dispela save bilong pasin tumbuna na kalsa bilong yumi.

Dokta Simet i tok olsem inap nau em 20 krismas Melanesian Festival ov Ats bin kamap na stap inap nau olsem na em laikim bai yumi mas strongim yet festival ya bikos em wanpela sab rijinol festival insait long Pasifik Rijn.

Papua Niugini long lukautim

dispela namba 5 Melanesian Festival ov Ats na Kalsa i soim na sapotim stret ol wanbel na tingting bilong Melanesian Spiahhet Grup (MSG). Wankain tu olsem Papua Niugini em bikpela brata insait long sab Rijnol long lukautim dispela festival em soim strong na wok bilong lukautim na kirapim yet ol kalsa namel long ol pipel bilong yumi.

Dokta Simet i mekim bikpela tok amamas i go long Praim Minista Peter O'Neill na Minista bilong Turism Ats na Kalsa Boka Kondra long

bikpela sapot bilong Gavman long mekim dispela festival i kamap. Wankain tu bikpela tok tenkyu go long ol arapela Minista, ol bos na mausman bilong ol ovasis opis hia long PNG na ol bos bilong ol gavman opis na dipatmen na arapela husat bin givim sapot go long kamapim dispela namba 5 Melanesian Festival ov Ats.

Em tok sapot bilong Gavman na ol arapela i soim amamas bilong dispela namba 5 Melanesian Festival ov Ats ken go het na kamap gut.



Ol piksa bilong lons bilong Namba 5 Melanesien Festival ov Ats na Kalsa



Festival graun i redi

OLGETA wok na ol samting bilong mekim kamap namba 5 Melanesian Festival ov Ats long Mosbi i kamap gut tru na i redi long lukautim festival long dispela wiken Sarere 28 Jun 2014.

Ol haus, banis, ples bilong slip, rijinol setelaits, stej o gren sten we ol pilai na danis bai kamap long en na olgeta arapela wok redi i kamap gut na sambai tasol long festival i ken kamap long dispela wik.

Minista bilong Turis, Ats na Kalsa Boka Kondra i tokaut long dispela long taim em opim ples bilong festival long las wik.

Mista Kondra i tok em amamas long lukim olsem o l wok redi i kamap gut tru na pinis na em mekim bikpela tok tenkyu go long olgeta lain husat i mekim ol wok bilong ol samting i kamap. Planti long ol em ol kontrakta bilong wokim ol haus, brukim graun na mekim ples i kamap redi, pulim ol pawa na wara na planti arapela moa.

Minista Kondra i tok amamas tu long lukim olsem ol provinsel haus tu i kamap gut na redi we em salim toksave nau long

wan solwara kantri na ol Melansian brata susa long kam na amamas wantaim yumi long Papua Niugini long dispela namba 5 Melanesian Festival hia long Papua Niugini.

Minista i askim tu ol Gavana bilong wanwan provins long helpim ol provinsel grup bilong ol long kamap long Mosbi long stap insait long dispela bikpela festival. I gat plen tu long salim ol Melanesian kantri husat bai kam hia long Papua Niugini sapos ol ken go soim ol danis na ol tumbuna samting bilong ol long arapela provins tu. Em i askim ol Provinsel Gavana long sambai tu long helpim wantaim dispela.

Minista i mekim bikpela tok tenkyu go long Praim Mnista Peter O'Neill na ol ministri opisa bilong givim olgeta sapot na helpim long mekim kamap dispela festival. Taim i sot long putim olgeta samting long kamap gut tasol sapot na hatwok bilong olgeta lain i mekim olgeta samting i ron gut na festival inap kamap gut long dispela wiken.



Gavana Parkop opim festival graun

GAVANA bilong Nesenel Kapitool Distrik (NCD) Powes Parkop i opim Waigani Festival graun long las wik Sarere we i opim nau long bikpela so bilong Melanesian Festival ov Ats na Kalsa ken kamap long dispela wik Sarere.

Gavana Parkop i tok siti bilong Mosbi i amamas long lukautim dispela bikpela so bikos dispela festival em gat bikpela mining long yumi Papua Niugini na ol wantok bilong yumi long Melanesia husat bai kamap tu long Mosbi long dispela so. Olsem na ol wantok long ol Melanesia kantri i welkam long PNG long

Pot Mosbi.

Mista Parkop i tok em taim bilong yumi soim na strongim tru kalsa na tumbuna pasin bilong yumi we yumi pulap tru long dispela insait long Melanesia na ol wansolwara kantri yumi stap klostu wantaim.

Em tok namel long ol dispela boda o bandri bilong solwara go olsem long Indonesia na Tores Trait long Australia na long Fiji go olsem long Nu Kaledonia em yumi pulap tru long pasin tumbuna na kalsa bilong yumi. Yumi holim dispela ol dispela samting we i mekim yumi narakain long ol arapela kantri insait long wol.

Planti kantri i gat tumbuna pasin o kalsa bilong ol tasol yumi em narakain we i soim na makim piksa bilong yumi ol Melanesia lain stret. Yumi gat histri o stori bilong yumi long bipo i kam nau na em taim bilong soim insait long ol danis, singsing, tumbuna bilas na ol samting yumi save wokim long han na arapela moa. Dispela i givim mining long yumi ol Melanesia pipel, em i tok.

Gavana i tok Pasifiik nau i wok long lukim ol kankain bikpela senis long pasin na stail we i kamapim wanpela nupela kalsa insait long sosaiti na kantri bilong yumi. Em ol nu-

pela pasin we i wok long kam bikos long ausait lain na bisnis i kam insait pinis na yumi stap insait long en. Tasol yumi ken holim na strongim yet ol pasin tumbuna na kalsa bilong yumi long dispela kain festival olsem.

Em i tok dispela kain festival inap soim tru ol arapela kantri long wol long ol kankain pasin na wei bilong yumi we yumi holim yet na bihainim yet. Sapos yumi lusim kalsa na pasin tumbuna bilong yumi nau, bai yumi lus insait long pasin bilong arapela kantri insait long wol na bihainim narakain na nupela stail olgeta we i no pasin tru bilong

yumi moa.

Gavana Parkop i bin opim dispela festival graun we em lukluk tu raun insait long ol sampela tumbuna haus we ol provins bilong Papua Niugini bin kamap na sanapim long hap. Ol arapela memba bilong palamen olsem memba bilong Midel Flai Roy Biyama na memba bilong Maprik John Simon bin stap tu long witnessim opim bilong Festival graun.

Bihain long opisel opening bilong Festival graun, ol kundu i pairap na singsing grup i stat long mekim save long soim olsem festival i op.

Gavana Muthuvel sainim tok orait bilong rais projek

WES Nu Briten Gavana, Sasindran Muthuvel i sainim wanpela tok orait o MOU wantaim Trukai Industri Limited long groim rais insait long Wes Nu Briten Provins.

Dispela MOU em bilong wanpela Pailot Komesel Rais Projek long kamap insait long Kapore.

Ol tupela lain i bin sainim dispela MOU long taim ol i holim Trukai Fil De long namba wan taim. Ol memba bilong WNB PEC, Morobe Gavana, Kelly Naru, Memba bilong Kairuku Hiri, Peter Isaiano, Memba bilong Naweb, na ol deliget bilong Sentral Provins Edministresen na sampela ol bikman bilong Trukai i bin stap long dispela taim.

Mista Muthuvel i bilip olsem taim rais i kam insait long provins em bai helpim ol pipel long senisim tingting na pasin bilong ol pipel bikos wok bilong lukautim rais em i gat bikpela wok long ol bai lukluk klostu olgeta taim.

"Em i wanpela kain krop i save laikim ol man i mas givim gutpela lukaut long em bai karim gutpela kaikai. Long dispela as em bai mekim ol fama long tingting strong long lukautim gut na papa long dispela rais, na bai mekim ol i save long lukautim ol narapela gavman projek tu long wankain pasin," Mista Muthuvel i tok.

I gat tupela kain MOU bilong 3-pela yia em Gavman i sainim wantaim Trukai Industri. Wanpela em long kirapim wanpela 100 hekta graun long Kapore bilong kamapim Komesel Rais Prodak- sen na narapela long kamapim ol narapela hait ples bilong Rais Egrikalsa ol bai yusim olsem trening senta na sastenabiliti sevis.

Mista Muthuvel i gat strongpela laik long lukim dispela projek i karim kaikai bikos em i laik daunim 300,000 tan rais saplai i save kam long ovasis long in- apim maket long PNG.



Gavana Muthuvel i sainim MOU wantaim, Greg Worthington-Eyre na ol WNB Provincial Eksekutiv Kaunsil (PEC) memba i lukluk stap.

"Rais em i namba wan kaikai insait long PNG long taim bilong wok bilong kalsa, sios na ol narapela sosel bung ol i save kaikai na tu em i kaikai bilong wanwan haus olgeta de. Em bai gutpela tru long lukim 1000 o 2000 tan rais i ken kamap insait long provins," Mista Muthuvel i tok.

Em i tok Wes Nu Briten i wanpela strongpela egrkalsa provins bikos em i gat bikpela welpam na ol narapela egrikalsa bisnis olsem kopra na kakao.

"Yumi no ken hatwok tumas long lainim pasin bilong groim rais," em i tok.

"Mipela long Provinsal Gavman bai givim graun na ol narapela samting long tim bilong Trukai long kam na mekim wok bilong projek," em i tok.



Westpac Women's Education Grants

Westpac is giving three women the chance to continue their education through the Westpac Women's Education Grants.

There are three Grants available to tertiary students or adult workers who wish to return to study. The successful Grant recipients will each receive K6,000 to contribute towards their education costs. All local women are encouraged to apply.

What do I need to do?

Simply answer the following question: if you could meet the three most important needs for women and girls, what would these be and why?

Applications close at 5pm Friday 11 July 2014 and must be completed using the official application form.

For more information and an application form, visit your local Westpac branch or www.westpac.com.pg



Things you should know: Please refer to the full terms and conditions on entry prior to applying for the Grant, which is set out on the application form. Westpac Banking Corporation ABN 33 007 457 141. The liability of its members is limited. Westpac is represented in Papua New Guinea by Westpac Bank-PNG Limited. WPSW1297 (05/14) 392311_PG



MEKIM SAKSAK: Saksak i wanpela kaikai long planti hap bilong PNG. Em i wanpela rot pipel i save kisim mani long en taim ol i salim long maket. Hia em wanpela man Kerema i sikarapim saksak olsem hap rot long mekim saksak.



Ol rif na pis long Basamuk Be stap orait- DEC

OL KORAL RIF na ol pis insait long solwara long Basamuk Be, Madang Provins i stap gut tru na tu planti nupela rif I gro na sampela spesel fis i wok long go raun long ol rif arere long be.

Ol daiva blong Dipatmen ov Envaïromen na Konsevesen (DEC) i tokaut long dispela long Trinde bihain long ol i swim i go daun long solwara na glasim ol rif na laip bilong ol pis long Basamuk Be eria long mekim indipenden ripot long glasim sapos dispela rabis or teiling bilong Basamuk Rifaineri i kamapim sampela hevi long solwara.

Tim lida bilong DEC Tim Robert Sine i tok ol dispela indipenden asesmen o wok-painimaut i bin kamap dispela wik bikos planti ripot nogut i bin kamap long niuspepa na sosel midia olsem ol teiling o pipia bilong Ramu NiCo long Basamuk Rifaineri i wok long go daun long solwara na kilim ol pis na bagarapim ol rif.

Tasol long dispela wik ol atoriti stret blong Gavmanem, DEC yet i go long Basamuk na bung wantaim ol pipel na bihain mekim wok painim aut bilong en na i soim ol rip na laip bilong ol pis long solwara i stap orait yet.

Ol DEC tim wantaim opisa bilong Mineral Risoses Atoritnatu (MRA) Mains Opis bilong Madang Provinsal Gavman i go wantaim i bin stap long Basamuk long karimaut wok painimaut long solwara arere long Basamuk Rifaineri bihain long planti ripot i kamap bihain sampela lain long Basamuk i wok long givim kainkain ripot nogut long niuspepa tu toktok wantaim non-gavman ogenaïsesen (NGO) long bagarapim nem bilong Ramu NiCo olsem em i tromoi ol pipia i go insait long solwara na bagarapim ol rif na kilim indai ol pis na ol enimal long solwara.

Dispela wok painim aut em Minister bilong Envaïromen na Konsevesen Klaimet Senis.

John Pundari givim strongpela toktok long em i kamap long painim aut sapos i bagarap i kamap o nogat.

Wanpela strongpela DEC tim i bin go long Basamuk na mekim wok painim aut na i bin toktok wantaim ol local pipel bilong ples Mindre, we wanpela komuniti lida nem bilong em Terry Kunning i save long toktok tumas na go long midia na tu yusim ol NGO lain olsem rot long stretim ol hevi bilong em.

Ol DEC lain wantaim ol opisa bi-



Dokta Lemas i sekim ain-paip bilong Terry Kunning.



Ol DEC lain soim ol graun na sempel ol bai salim i go long long moa wok painim aut.

long MRA i bin go long Mindre viles long Tunde na go stret long fran long haus bilong Terry Kunning na i toktok wantaim em na em i givim kainkain ol tingting bilon gem.

Taim ol DEC opisa i bin askim em wanem hap tru em i kisim ol graun em i tokaut long midia we i kamaut long solwara, em i tok tumora bai em soim ol DEC lain.

Long Trinde, ol DEC lain i go aut long wanpela sip bilong karimaut wok painim aut, na ol DEC lain i bungim Terry Kunning long kanu long solwara autsait tasol long Dip Si Teiling Plesmen (DSTP) bilong Ramu NiCo.

Tim lida bilong DEC, Mista Sine i tok ol i guria stret olsem Terry Kunning i stap namel long solwara na yusim string long pulim aut ol pipia

long solwara na save toktok tumas long niuspepa na sosel midia olsem graun bagarapim nambis na ol rif.

Dispela local man Terry Kunning em wanpela man tasol husatl save go oltaim long niuspepa na tu givim kainkain giaman ripot long ol NGO olsem Ramu NiCo DSTP i bagarapim solwara.

Taim ol DEC opisa i so kamap wantu tasol Terry Kunning i kisim wanpela plastic kontena na i soim ol graun em i tok em i kisim insait long solwara bihain long em i tromoi string wantaim wanpela ain-paip i go daunna pas long graun na kisim graun i kam antap.

Ol DEC opisa i tokim em olsem ol i no inap kisim dispela sempel em i soim ol bikos ol ino bin stap na



Ol daiva i sekim ol pis rif long Basamuk Be.



Lokal man bilong Mindre viles, Terry Kunning soim ain em save yusim long kisim graun o teiling bilong Basamuk Rifaineri aninit long Basamuk solwara na save toktok olsem em painim long nambis.

em i kisim. Olsem na ol i askim em long soim ken rot em i yusim, na Kunning i tromoi string i go daun tripela taim. Na long tupela taim em i no kisim graun i kam antap. Wanpela taim tasol em paip bilong em i bringim liklik hap graun i kam antap.

Ol DEC lain i lukim rot Terry Kunning i wokim long kisim aninit tru long solwara na bringim i kam antap na save toktok tumas long niuspepa na givim stori blong em long ol NGO. Dispela eria we Terry Kunning i go kisim graun long em miksing zon we i stap insait long Permit bilong DEC. Na wanem dispela man i wokim em i no stret.

Ol DEC lain i kisim string blong Terry Kunning we ol bai karim i go na kisim longpela bilong em na

mekim ripot long en.

Olsem polsol DEC i kisim long ol daiva insait long solwara em ol bai salim i go long Australia long mekim moa wok painim aut long em long givim ripot i go long Minista blong Envaïromen Konsevesenna Klaimet Senis, John Pundari.

Terry Kunning tu em wanpela man husait i bin go pas long dispela bikpela DSTP kot long stopim Ramu NiCo bai noken husim DSTP. Tasol Nesinol na Suprim kot i bin rausim kot bilong Terry na larim Ramu NiCo long husim DSTP tete.

Tete, Terry Kunning i save traim long husim ol midia na NGO olsem Bismarck Ramu Grup insait long Madang long bagarapim nem bilong Ramu NiCo Projek.

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biling i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paipain)

'Wanpela Ramu NiCo, Wanpela Komuniti'

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta



Fan Ran neks yia bai kam aninit long 2015 Pasifik Gems

i kam long pes 28

Hunters mas win

Long lain ap bilong ol Hunters long dispela wiken, Michael Marum i mekim sampela senis bikos sampela gutpela pilaia bilong em bai no inap long pilai bikos ol i kisim bagarap.

Laip ap em 1. Adex Wera 2. Garry Lo 3. Noel Zeming 4. Israel Eliab 5. Edward Goma 6. Dion Aiye 7. Roger Laka 8. Willie Minoga 9. Wartovo Puara 10. Esau Siune 11. George Benson 12. David Loko 13. Adam Korave 14. Lawrence Tu'u 15. Biuku Tiger Emere 16. Sebastian Pandia 17. Jason Tali 18. Brandy Peter.

TRUKAI Fan Ran em i wanpela bikpela komyuniti spot program long kantri we planti yangpela na olupela manmeri i save bihainim long olgeta yia.

Dispela spot program i save kamap long kamapim mani bilong sapotim tim PNG long go pilai long ol bikpela spot pilai olsem Komonwelt Gems na Olimpiks. Na tu, long bungim ol pipel bilong ol komyuniti long stap gut na helti.

Long amamasim namba 31 Fan Ran long Pot Mosbi, Presiden bilong Papua Niugini Olimpik Komiti (PNGOC), Sir John Dawanincura, i tok Fan Ran long neks yia bai stap insait long program bilong 2015 Pasifik Gems.

Em i tok dispela em i gut-

pela, long wanem, em bai bringim ol pipel i kam klostu na pilim spirit bilong dispela bikpela pilai long neks yia.

Opisal maskot bilong 2015 Pasifik Gems, Tura, i bin stap long amamasim Fan Ran long las wiken wantaim ol pipel bilong Pot Mosbi.

Minista bilong Spot, Justin Tkatchenko, i bin stap tu long dispela moning. Minista Tkatchenko i tok em i amamas long lukim ol famili i kam aut na amamasim Fan Ran.

"Planti bilong yumi long Papua Niugini i wok long dai bikos long ol laip stail sik, na kain komyuniti spot program olsem Fan Ran i ken helpim ol pipel long stap helti na strong," Minista Tkatchenko i tok.



Minista bilong Spot Justin Tkatchenko i ran long Fan Ran wantaim ol komyuniti long Pot Mosbi.



Tura Kokomo i mekim sampela ekasesais wantaim fani man Watete long Fan Ran long Pot Mosbi.

PNGRFL sapotim ol referi

Isaac Liri i raitim

PLANTI taim long Papua Niugini, long sait bilong ragbi lig, taim gem i no kamap stret long laik bilong ol sapota, ol referi i save kisim hevi. Na sampela taim ol i save kisim bikpela bagarap.

Long ragbi lig, ol referi i impoten, na Papua Niugini Ragbi Futbol Lig (PNGRFL) i luksave long dispela na i givim sapot long ol.

Olgeta referi bai kisim skul long ol trening program na bai kisim pepa long kamap referi. PNGRFL bai lukim olsem dispela i kamap.

Siaman bilong PNGRFL, Sandis Tsaka, i tok sapos yumi lukautim na sapotim gut ol referi bilong yumi, levul bilong ragbi lig insait long kantri bai develop.

Mista Tsaka i tok sapos yumi kamapim ol gutpela pilaia na kosa, yumi mas kamapim ol gutpela referi tu.

Em i tok taim ol referi i go long kisim skul long kamap ol gutpela referi, ol bai no inap long lainim long kontrolim gem tasol. Ol bai lainim long givim skul long ol yangpela pilaia tu.

"Taim gem i gat gutpela referi, no gat hevi bai kamap," Mista Tsaka i tok.

OI PNG kosa na ampaia i trening long kriket

KRIKET PNG na Kwinslan Kriket bilong Australia i wok bung na kamapim wanpela trening bilong ol kosa na ampaia long Pot Mosbi long las wiken.

Dispela skul o trening em Kwinslan Kriket i givim sapot long en, aninit long State/Province Partnership Program (SPPP).

SPPP i em wanpela program we i save kamap long strongim na developim kriket long ol kantri husat i memba bilong Intenesenel Kriket Kopresen (ICC) insait long ls Esia Pasifik Rijon (EAP).

Ol stet bilong Australia na ol provins bilong Nu Silan i save go pas long SPPP.

Aninit long SPPP, ol kriket ogenesisen bai strongim wok pren namel long ol yet, na developim dispela spot long ol kantri long EAP we kriket i no strong tumas.

Dispela program bai

lukim planti ol kriket opisa bilong Kwinslan Kriket husat i gat ekspirians i kam long Papua Niugini na givim trening long ol yangpela kriket pilaia.

Long taim bilong dispela trening, ol representiv bilong Kwinslan kriket i tok ol i save sapotim kriket long Papua Niugini long bipo yet i kam inap nau.

Ol i tok ol i gat bikpela laik long sapotim Kriket PNG bikos ol i gat bilip olsem kriket long PNG em i ken kamap bikpela, na PNG i ken gat sans long pilai long Wol Kap long ol yia i kam.

Ol kosa na ampaia husat i bin stap long dispela trening i bin kam long NCD, Morobe, Oro na Milen Be. Ol sampela kriket menesa na sampela pilaia bilong ol PNG Baramandi i bin stap tu.



Jeff Thomas bilong Kwinslan Kriket i soim sampela stail bilong bet long trening bilong ol kosa na ampaia long Pot Mosbi.

SP Pot Mosbi Ragbi Lig Dro: Raun 4

Tarangau	Vs	Kone Tigers
Paga Panthers	Vs	Magani
Maiari Eagles	Vs	Brothers
Souths	Vs	West
Butterflies	Vs	Kone Storm
Hohola	Vs	Royals
Hawks	Vs	Defence
Dobo Warriors	Bye	

Ol poto na stori i kam long NRL websait



PARRAMATTA: Manu Ma'u bilong Parramatta Eels bai no inap long pilai inap long tenpela wik olgeta. Dispela bai givim hat taim long ol Parramatta bikos em i wanpela bilong ol top pilaia.



STATE OF ORIGIN SUPER SPECIALS

Buy a MS 720 Chainsaw

Get 2x MILLS FREE!

*(Mini & Alaskan Mill)

Plus a free STIHL Esky with K400 worth of Accessories (SPARK PLUG, 2 STROKE OIL, RIP CHAIN, FILES & WEDGES)

FOR ONLY
K6,700*
Tax inclusive



*Hurry only limited time & stock available

Port Moresby

Call 325 5766

Lae

Call 472 2444

Kokopo

Call 982 9299



SPOTS DRO RAUN 16

Fraide: Jun 27, 2014



7.40pm
Brookvale Oval

S.Eagles V^s Roosters



7.40pm
Suncorp Stadium

Broncos V^s Sharks



Sarare: Jun 28, 2014



5.30pm
Campbelltown Stadium
W/Tigers V^s Raiders



7.30pm
1300 Smile Stadium
Cowboys V^s Rabbitohs



Sande: Jun 29, 2014



2.00pm
Mt. Smart Stadium
Warriors V^s Panthers



3.00pm
Pirtek Stadium
Eels V^s Knights



Mande: Jun 30, 2014



7.00pm
WIN Stadium
Dragons V^s Storm



Bai

Titans na Bulldogs

Raun 15 Poin Lata

Pos	Tim	W	B	L	D	Pts
1.	Sea Eagles	9	2	4		22
2.	Panthers	9	2	4		22
3.	Rabbitohs	9	1	5		20
4.	Roosters	9	1	5		20
5.	Bulldogs	9	1	5		20
6.	Broncos	8	1	6		18
7.	Storm	8	1	7		18
8.	Eels	8	1	6		18
9.	Tigers	7	2	6		18
10.	Warriors	7	1	7		16
11.	Cowboys	6	1	8		14
12.	Titans	6	1	8		14
13.	Dragons	6	1	8		14
14.	Raiders	4	1	10		10
15.	Knights	3	1	11		8
16.	Sharks	2	2	11		8

QRL Intrust Super Cup draw

Round 18 (28-29 June)		
Home	Vs	Away
Easts		Bye
Pride		PNG
Mackay		Norths
Capras		Burleigh
Wynnum		Souths
Sunshine Coast		Ipswich
Redcliffe		Tweed



TUNA IN OIL

Moa oil na meat insait

Hunters mas win!

Isaac Liri i raitim

BIHAIN long ol i lus tupela taim long las wik na long wik bipo las wik, ol Hunters i nau sindaun long namba 6 spot long lata bilong Kwinslan Kap.

Oi PNG Hunters i bin gat sans long winim gem las wiken long Kalabond tasol ol Easts Tigers i bin pilai strong na pasim rot bilong ol.

Easts Tigers em namba tu

tim long winim Hunters long Kalabond. Namba wan tim long winim Hunters long Kalabond em Northern Pride, na long dispela wiken, ol bai pilai egensim ol long Barlow Park.

Dispela hap em hom graun bilong ol Northern Pride, na ol Northern Pride i gat gutpela rekot long hom graun bilong ol long dispela yia.

Kosa bilong ol Hunter Michael Marum i tok gem bilong ol long dispela wiken em i

wanpela bikpela gem tru bilong ol Hunters, long wanem, ol bai pundaun i go daun long lata sapos ol i no win. Na sapos ol i pundaun i go daun, ol bai no gat sans long pilai long fainels.

Oi Hunters i bin win wanpela taim tasol long Barlow Park. Dispela i bin kamap long stat bilong dispela yia taim ol i pilai wantaim Northern Pride long wanpela trail gem.

Moa long Pes 25.



Strongpela prop bilong ol Hunters Timothy Lomai bai no inap long pilai long dispela wiken bikos em i kism bagarap long han bilong em *Poto Nicky Bernard.*

FAN RAN AMAMASIM FAMILI:

Trukai Fan Ran long Pot Mosbi i bin lukim planti famili i kam aut na amamas. Long dispela poto yu lukim Genaia famili i amamas long Fan Ran long las wiken. Trukai Fan Ran long neks yia bai kam aninit long 2015 Pasifik Gems. Moa Stori long Pes 25. *Poto Nicky Bernard.*





PMV

DIESEL OIL



PMV OIL BILONG YUMI

BOROKO MOTORS

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2658
KOKOPO	☎	982 8193
GOROKA	☎	532 3552

Email: info@borokomotors.com.pg
Website: www.boroko-motors.com